

BERITA HARIAN

Dr M restui Mukhriz bertanding

Bekas Perdana Menteri tidak akan bantu kempen di Parlimen Jerlun



Oleh Saufi Hamzah

GOMBAK: "Saya beri restu kepada anak saya (Datuk Mukhriz) bertanding di Parlimen Jerlun," kata Tun Dr Mahathir Mohamad ketika ditanya mengenai kedudukan anaknya yang dicalonkan bertanding pada Pilihan Raya Umum Ke-12, bulan depan.

Bekas Perdana Menteri berkata, pencalonan anaknya ditentukan pucuk pimpinan Umno dan beliau tidak membuat sebarang usaha melobi.

Bagaimanapun, beliau menasihatkan Mukhriz memandang serius perkara itu (sebagai calon) dan harus bekerja kuat.

Ditanya sama ada anaknya mempunyai wibawa sebagai calon, Dr Mahathir berkata: "Saya tak tahu, itu terpulang kepada pengundi untuk menentukan;

"Saya tak boleh kata anak saya kuat, berkuasa, bijak dan lain-lain," katanya pada sidang media selepas merasmikain Seminar Kebangsaan Kependidikan Halatuju Belia dan Remaja 2008 di Universiti Islam Antarabangsa (UIA), di sini semalam.

Seminar itu anjuran Pertubuhan Kebajikan Islam Malaysia (Perkim) cawangan Darul Sham, Taman Tun Perak, Rawang.

Ketika ditanya sama ada beliau akan membantu kempen anaknya, Dr Mahathir yang juga Yang Dipertua



"Saya tidak akan membantunya dalam kempen...itu pilihan saya"

Dr Mahathir Mohamad
Bekas Perdana Menteri

Perkim berkata: "Saya tidak akan membantunya dalam kempen...itu pilihan saya."

Menjawab pertanyaan mengenai peluang anaknya di Jerlun, beliau berkata terpulang kepada penilaian terhadap Mukhriz oleh pengundi.

Kepada soalan mengenai sama ada kehadiran ramai calon mewarisi kepemimpinan dan ketokohan keluarga masing-masing dianggap kewujudan dinasti, Dr Mahathir berkata: "Masa saya letak jawatan, Setiausaha Agung Umno minta anak saya ambil alih tempat saya di Kubang Pasu tapi saya tolak.

"Saya tak nak orang kata saya nak dirikan dinasti, jadi kita tak harus ada dinasti dalam politik negara," katanya.

Mengenai senarai calon yang diumumkan bertanding kali ini, Dr Mahathir berkata, senarai itu adalah

baik dan ramai muka lama digugurkan dan muka baru diberi peluang.

"Gugur muka lama pula ada baik dan buruknya, ia bergantung," katanya sambil menegaskan beliau tidak berada dalam kedudukan untuk membuat penilaian sama ada calon itu berwibawa atau sebaliknya.

"Saya tak kaji (mengenai kewibawaan calon)...sebab baru sangat dengar nama-nama ini, tak kenal pun," katanya.

Dr Mahathir juga berkata, Barisan Nasional (BN) akan menang tetapi ada kemungkinan majoriti berkurangan.

Mengenai perkembangan Umno Perlis, beliau berkata ketika pemerintahannya memang ada perebutan kuasa tetapi pucuk pimpinan perlu menyelesaikannya secara bijak untuk faedah semua.